

Siunnersuut uunga: Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit inatsisartut inatsisaata allangortinneqarneranik Inatsisartut inatsisaat nr. xx, uu. qqqq 2017-imeersoq.

Saqqummiussissut

(Inatsisartut Siulittaasuut)

Siullermeerneqarnera

Inatsisartut Siulittaasoqarfiat sinnerlugu matumuuna Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit inatsisartut inatsisaata allangortinneqarneranik Inatsisartut inatsisissaannut siunnersuut saqqummiutissavara.

Inatsisartut ataatsimiinnerinut atatillugu ilaquuttanik ingiallorteqarsinnaanerup annertusineqarnissaa Siulittaasoqarfiup pisariaqartissimavaa.

Malittarisassat atuuttut malillugit Inatsisartunut ilaasortap Nuummi najugaqanngitsup ilaquitai qaninnerpaat ataatsimiinnermut atatillugu qaammatsiutit ukiui tamaasa ataasiarlutik akiliunneqarlutik angalasinnaallutillu najugaqarsinnaatitaapput.

Siunnersuutip malitsigissavaa ilaquuttat qaninnerit ataatsimiinnernut atatillugu qaammatsiutit ukiuni tamaasa marloriarlutik angalanissaminnut najugaqarnissaminnullu akiliunneqarsinnaalissammata.

Inatsisartunut ilaasortat ilaqtariittut inuunerat, minnerunngitsumillu ilaasortat meeraat, eqqarsaatigalugit, taakku isiginiarneqarnerunissaannik kissaateqarneq aallaavigalugu siunnersuut saqqummiunneqarpoq.

Siulittaasoqarfiup taamatuttaaq Inatsisartunut ilaasortat aamma Naalakkersuisunut ilaasortat soraarnerussutisiaqarnissamut aaqqissuussinermik pilersitsinissaat pillugu aningaasarsiaqartitsineq pillugu inatsimmi aalajangersakkat allangortinneqarnissaat pisariaqartissimavaa.

Malittarisassat atuuttut malillugit soraarnerussutisiatut naaffeqartumik tunniunneqartartut soraarnerussutisiatulluunniit inuuneq naallugu tunniunneqartartut Inatsisartunut ilaasortanut aamma Naalakkersuisunut ilaasortanut namminerisamik soraarnerussutisiaqarnissamut aaqqissuussinermik pilersitsisoqartartussaavoq. Soraarnerussutisiaqalernissamut aaqqissuussinerit soraarnerussutisiaqalernissamut aningaasaateqarfimmi nunatsinni angerlarsimaffilimmi pilersinneqassapput.

Soraarnerussutisiaqalernissamut aaqqissuussinerit maannakkumut PFA Soraarnermi pilersinneqartarsimapput. PFA Soraarnerli 1. januar 2018 atuutilersumik matussaaq, sillimmasersimasullu tamatumunnga atatillugu periarfissinneqarlutik soraarnerussutisiaqalernissamut aaqqissuussinermik PFA Pensionimut, nunatta avataani qullersaqarfeqartumut, nuunnissaannut.

Siunnersuutip malitsigissavaa Inatsisartunut ilaasortanut aamma Naalakkersuisunut ilaasortanut soraarnerussutisiaqalernissamut aaqqissuussinerit siunissami pilersinneqartalissammata malittarisassat soraarnerussutisiaqalernissamut aaqqissuussinermut pinngitsoorani ilaanissaq pillugu Inatsisartut inatsisaanni aalajangersarneqarsimasut malillugit. Tamanna isumaqarpoq soraarnerussutisiaqalernissamut aaqqissuussinerit, soraarnerussutisiaqalernissamut aningaasaateqarfimmi sillimmasiisarnermik ingerlatsineq pillugu inatsimmut ilaatinneqartumi, inuunermik soraarnerussutisiaqalernissamulluunniit sillimmasiisarnermik ingerlatseqatigiiffimmi sillimmasiisarnermik ingerlatsinissamut aningaasaqarnermik nakkutilliisoqarfimmit Finanstilsynimit akuerineqarsimasumi, imaluunniit aningaaserivimmi Kalaallit Nunaanni angerlarsimaffilimmi aalajangersimasumilluunniit ingerlatsivilimmi nunamilu maani aningaaseriveqarnermik ingerlatsinissaminut Finanstilsynimit akuerineqarsimasumi, pilersinneqassasut. Taamaalilluni soraarnerussutisiaqalernissamut aaqqissuussinerit soraarnerussutisiaqalernissamut aningaasaateqarfimmi imaluunniit inuunermik soraarnerussutisiaqalernissamulluunniit ingerlatseqatigiiffimmi pilersinneqartut eqqarsaatigalugit piumasqaataaangilaq pineqartup nunatsinni angerlarsimaffeqarnissaa aalajangersimasumilluunniit ingerlatsiveqarnissaa.

Tamatuma erseqqinnerusumik malitsigissavaa soraarnerussutisiaqalernissamut aaqqissuussinerit atuuttut attatiinnarneqarsinnaassammata, taamatullu aamma siunissami soraarnerussutisiaqalernissamut aaqqissuussinermik pilersitsinerimi soraarnerussutisiaqalernissamik aaqqissuussinermik neqerooruteqartut assigiinngitsut amerlanerusut akornannit toqqaasoqarsinnaalerluni.

Siunnersuutip peqatigitillugu malitsigissavaa soraarnerussutisiaqalernissamik aaqqissuussineq pilersinneqartoq pinngitsoorani soraarnerussutisiatut naaffeqartumik tunniunneqartartut imaluunniit soraarnerussutisiatut inuuneq naallugu tunniunneqartartut iluseqartariaarutissamat, kisiannili aamma taakkunanga ataqatigiissitsilluni tunniunneqartartussatut iluseqarsinnaalissalluni.

Taamatut oqaaseqarlunga Inatsisartut Siulittaasoqarfiat sinnerlugu siunnersuut Inatsisartunut oqaluuserisassanngortippara.